



火燒柑

阿舅在屋後背種十過頭桶柑，一有閒就行去屋背个細柑園抹抹摸摸，洩水、擲草、放肥料、剪樹桹一等煞猛，逐頭樹仔都分佢守顧到靚靚靚。三、四月仔，滿園青樹桹打起一蕊一蕊个細白花仔，間等一點一點卵黃色个花心，當得人惜，係一陣風吹過，清香幼秀个香水味還會拂到滿哪仔都係！該香氣，冤枉正得，有錢乜買毋著，你係在柑仔樹開花个時節行過柑園，一定愛曉得頓腳下來享受一下該香氣。

花皮一落地，青青个細柑仔子就緊大，毋過，柑仔子大異慢，愛一路等到年會到了，柑仔正會熟水，故所講佢係年柑。阿舅个年柑正經有用心守顧，一粒一粒平大圓篤，毋會螞，總係，粒粒都係火燒柑。

「阿舅，你買著火燒柑个種哦？」

「火燒柑哪有種？怕係若嫂煎魚仔、炒菜恁猛火，正會分油煙燻著！」

火燒柑个皮粗粗赤赤，賣相毋靚，毋過，厥水分異足又較有柑仔个香氣，故所當有柑仔个味緒，好食！總係，明明就種桶柑，人家个桶柑黃臘黃臘靚靚，阿舅年年都出火燒柑，敢正經係種草有問題？仰會恁怪奇！

原來，係阿舅个柑園在屋後背，較背日，雖然日日有人掌等，毋使洩除草劑乜毋使打農藥，一隻山牛牯分人看著都會摻佢捉忒，佢想愛在該位出子喫柑仔樹根、害樹仔黃忒，該斯毋使想！毋過，有一種蟲仔安到柑橘锈蟎，細細隻仔、像頭那毛恁(an)幼仔定定，偲个目珠全全看佢毋著來捉，佢本旦就好園在日頭較晒毋著个葉下樂樂个喫柑仔皮，阿舅背日个柑園就盡堵好。柑仔皮分這種蟲仔喫過會出油，柑仔油摻空氣鬥共下就變到烏色烏色个火燒柑了，係柚仔皮分佢涎過，乜會像噉過樣仔留等目汁痕。

故所，火燒柑毋係分火燒著、毋係分日頭難壞，乜毋係分阿嫂个油煙燻著，係蟲仔講該粒果子無打著農藥个天然認證。

作者：彭瑞珠

☆詞彙學習☆

【間等】gam den`：夾雜著。

【燻】fun：煙燻。

【正得】zang ded`：正是、真的是。

【背日】poi ngid`：背陰。陽光照不到的地方。

【圓篤】ien` dug`：頂端圓而厚實。「篤」指物體的頂端，如「笠嫫篤」、「屎脰篤」。

【柑橘锈蟎】gam` gid` xiu man`：锈蟎。一種會吸取柑橘類植物的皮表汁液，危害其生長和結果的害蟎。

【熟水】xiug` sui`：動植物或果實成熟。

☆文法學習☆

【斯】sii`：可、卻。用以表示前、後文的語意有所轉折、不同。

例1：衫著加一領哪！寒著斯無結煞喔！（多加件衣服吧！感冒可就麻煩了！）

例2：佢當晝頭愛食麵，該你斯呢？（我中午要吃麵，那你呢？）